

CONSELLERÍA DE EDUCACIÓN E ORDENACIÓN UNIVERSITARIA

Organismo: SECRETARÍA XERAL

SUMARIO:

Resolución do 29 de maio de 2008, da Secretaría Xeral da Consellería de Educación e Ordenación Universitaria, pola que se ditan normas para a adxudicación de destino provisional para o próximo curso académico 2008-2009 ás/aos mestras/mestres que non teñan destino definitivo, aos que resultan desprazados por falta de horario, aquelas/aqueles as/aos que se lles conceda unha comisión de servizos por concelleiro, por motivos de saúde ou por conciliación familiar, opositoras/opositores de 2008, interinas/os e substitutas/os e as/os que soliciten o reingreso no servizo activo.

TEXTO:

Coa finalidade de adxudicar destino provisional para o curso académico 2008-2009 ás/aos mestres sen destino definitivo, ás/aos mestres desprazados por falta de horario, e as/aos que se lles conceda unha comisión de servizos por concelleiro, por motivos de saúde e por conciliación familiar, opositoras/opositores de 2008, interinas/os e substitutas/os e ás/aos que soliciten o reingreso no servizo activo, convócase o presente concurso coas seguintes bases:

Primeira.- Obxecto

Convócase concurso, de acordo coas especificacións que se citan na presente resolución, para a provisión de necesidades de profesorado para o curso académico 2008-2009 nos centros que se relacionan no anexo desta resolución, entre ás/aos mestras/mestres que están obrigadas/os a participar, conforme ao previsto na base segunda da presente resolución.

Segunda.- Obrigatoriedade de participación.

Están obrigadas/os a participar neste concurso:

- a) O profesorado que teña concedida unha comisión de servizos por razóns de saúde, pola situación persoal do propio docente.
- b) O profesorado que teña concedida unha comisión de servizos por razóns da saúde, pola situación persoal dun familiar.
- c) O profesorado desprazado por falta de horario, o profesorado suprimido e as/os mestras/mestres que perderon o seu destino definitivo por outras causas. Considérase que unha/un profesora/profesor non ten horario no seu centro cando non dispón de ningunha hora da súa especialidade.
- d) O profesorado que teña que reincorporarse á Comunidade Autónoma procedente do estranxeiro.
- e) O profesorado que teña dereito a que se lle conceda unha comisión de servizos por concelleiro.
- f) O profesorado que teña concedida unha comisión de servizos por razón de conciliación familiar e laboral.
- g) As/os mestres en situación de expectativa de destino que non obtiveron o primeiro destino definitivo, que se ordenarán por anos de celebración do concurso-oposición, e dentro de cada concurso-oposición polo número de orde obtido nel.
- h) O profesorado que solicite o reingreso ao servizo activo con efectividade do inicio do curso académico 2008-2009.
- i) As/os opositores que superen o procedemento selectivo para ingreso no corpo de mestres, convocado pola Orde do 9 de abril de 2008, pola orde obtida no

procedemento selectivo, en virtude das relacións expostas polas comisións de selección.

- j) O profesorado interino e substituto, pola mesma orde que elixiron no curso académico 2007-2008.

Terceira.- Desprazados por falta de horario

1.- Estarán obrigados a participar neste concurso, nas especialidades para as que estea habilitado, e a prazas da súa localidade ou zona educativa:

a) As/os funcionarias/os de carreira do corpo de mestres que, tendo destino definitivo, deban ser desprazadas/os por falta de horario no seu centro de destino, no curso académico 2008/2009.

b) As/os que, estando obrigadas/os, non participen neste concurso, a secretaria xeral, adxudicaralles de oficio destino provisional para o curso académico 2008/2009 nun centro da localidade ou zona educativa na que está destinado definitivamente.

c) Quedarán exentos de participar obrigatoriamente polo punto 1 desta base as/os mestras/mestres que participen polo punto segundo.

2.- Poderán participar voluntariamente neste concurso, a prazas da especialidades para as que estean habilitados, e da localidade ou localidades que elixan, os funcionarios de carreira do corpo de mestres que, tendo destino definitivo, poidan ser desprazados por falta de horario no seu centro de destino, no curso académico 2008/2009.

3.- A Administración educativa comunicaralles aos centros educativos e ás/aos interesadas/os, incluídas/os os centros públicos integrados e institutos de educación secundaria, con anterioridade ao 25 de xuño de 2008, o número de mestras/mestres e de

que especialidade non van a ter horario no próximo curso académico. Asemade, a Inspección educativa remitirá copia desta información á Secretaria Xeral.

4.- Na adxudicación das/os desprazadas/os por falta de horario terán dereito preferente as/os desprazadas/os da localidade, desempatando a maior antigüidade no corpo, a maior antigüidade no centro e a maior puntuación no proceso selectivo polo que accederon ao corpo, sucesivamente.

5.- As/os mestras/mestres desprazadas/os por falta de horario participarán obrigatoriamente no próximo concurso de traslados que se convoque cos dereitos outorgados ao profesorado suprimido.

Cuarta.- Prazas que poden solicitarse.

As/os mestras/mestres poderán solicitar as seguintes prazas, de acordo coas especificacións que se conteñen nesta base:

- a) As correspondentes ás especialidades para as que estean habilitadas/os, para os centros e localidades que figuran no anexo desta resolución. Os códigos das especialidades son os seguintes:

| Código | Especialidade |
|--------|---|
| 31 | Educación Infantil |
| 32 | Filoloxía e lingua estranxeira: inglés |
| 33 | Filoloxía e lingua estranxeira: francés |

| | |
|----|--|
| 34 | Educación Física |
| 35 | Educación Musical |
| 36 | Pedagogía Terapéutica |
| 37 | Audición e Linguaxe |
| 38 | Educación Primaria |
| 60 | Pedagogía Terapéutica, ESO |
| 61 | Audición e Linguaxe, ESO |
| 63 | Prazas de PT e ocio nas Escolas Fogar ou CEE |
| 64 | Prazas de EP e ocio nas Escolas Fogar ou CEE |

A estes efectos enténdese que todos as/os mestras/ en expectativa de destino posúen a especialidade de “primaria”.

b) Ademais, poderán solicitar as vacantes dos departamentos de orientación (código 39), que se adxudicarán dando prioridade as/aos mestras/mestres que estean en posesión da titulación de psicopedagogía, ou en psicoloxía, ou en filosofía e ciencias da educación (especialidades de psicoloxía ou ciencias da educación) ou en filosofía e letras (especialidades de pedagogía ou psicoloxía), conforme prescribe o artigo 4.a) do Decreto 120/1998, polo que se regula a orientación educativa e profesional na comunidade autónoma de Galicia.

c) De acordo co preceptuado na disposición transitoria primeira da Lei orgánica 2/2006, do 3 de maio, de educación, os mestres que ao 24 de maio de 2006 tiveran destino definitivo nunha praza do primeiro e segundo curso da educación secundaria obrigatoria, poderán solicitar, ademais, as prazas correspondentes ás especialidades para as que estean habilitados, para os centros públicos integrados e institutos de educación secundaria que figuran no anexo desta resolución e para as especialidades:

| | |
|----|--|
| 21 | Ciencias Sociais- Xeografía e Historia |
| 22 | Ciencias da Natureza |
| 23 | Matemáticas |
| 24 | Lingua Castelá |

| | |
|----|---|
| 25 | Filoloxía e Lingua Estranxeira: Inglés |
| 26 | Filoloxía e Lingua Estranxeira: Francés |
| 27 | Educación Física |
| 28 | Educación Musical |
| 60 | Pedagogía Terapéutica, ESO |
| 61 | Audición e Linguaxe, ESO |
| 67 | Lingua Galega |

Ademáis, o profesorado das especialidades de pedagogía terapéutica e audición e linguaxe poderán solicitar, en calquera caso as especialidades 60 ou 61 respectivamente.

- d) As/os opositoras/opositores que superen o procedemento selectivo convocado pola Orde do 9 de abril de 2008 unicamente poderán solicitar prazas da especialidade pola que acceden.
- e) As/os mestras/mestres interinas/os e substitutas/os unicamente poderán solicitar prazas da especialidade correspondente á lista na que figuran e de “primaria”.

Quinta.- Solicitud de centros e/ou localidades e procedemento de adxudicación.

As/os mestras/mestres poderán solicitar centros e/ou localidades de calquera provincia aínda que non teña solicitado o traslado do expediente, indicando se desexan impartir áreas afíns e/ou itinerancia.

No caso de solicitar centros, e de existir nos mesmos máis dunha vacante da mesma especialidade, unha delas cun horario completo e outra para completar con áreas afíns, adxudicarase en primeiro lugar a praza ou prazas que teñan horario completo da especialidade pola que se participa.

No caso de solicitar localidade entenderase que solicitan todos os centros da localidade incluídos no anexo desta resolución, pola orde en que aparecen no referido anexo. No caso de que soliciten localidade con itinerante e/ou afíns, entenderase que

solicitan con prioridade todos os centros desta sen itinerancia, sen afíns e posteriormente con itinerancia e/ou afíns, polo que a orde de adxudicación sería a seguinte:

1. Vacantes de todos os centros desa localidade, coa ordenación do anexo da convocatoria, e dentro de cada un deles, de todas as especialidades posibles, sen afíns e sen itinerancia.
2. Vacantes coas mesmas condicións, con afíns e que non sexan itinerantes.
3. Vacantes coas mesmas condicións sen afíns e que sexan itinerantes.
4. Vacantes coas mesmas condicións con afíns e que sexan itinerantes.

No caso de non consignar coa petición o código da especialidade, a adxudicación farase pola orde en que o participante o manifestou na súa solicitude de participación.

Sexta.- Orde de adxudicación

1.- A orde de adxudicación dos destinos provisionais será por colectivos preferentes, conforme o previsto na base segunda, sen prexuízo dos dereitos preferentes a centro, localidade e zona educativa, regulados na presente resolución.

2.- Na adxudicación de prazas ás/aos mestras/mestres en comisión de servizos por razóns de saúde, os criterios de prioridade veñen determinados pola maior antigüidade no corpo, a maior antigüidade no centro e a maior puntuación no proceso selectivo, sucesivamente.

3.- Na adxudicación de prazas ás/aos mestres en comisión de servizos por razón de conciliación da vida familiar e laboral a prioridade virá determinada polo número de fillas/os menores de 10 anos e, no caso do mesmo número de fillas/os, pola antigüidade como funcionaria ou funcionario de carreira no corpo, e antigüidade no centro e puntuación na oposición, sucesivamente.

Sétima- Dereito preferente a centro.

Terán dereito preferente a centro:

a) As mestras e mestres suprimidos, ás prazas do centro no que tiñan destino definitivo.

b) As concelleiras e concelleiros, ao centro no que prestaban servizos no momento no que resultaron elixidas ou elixidos.

Oitava.- Dereito preferente a localidade

Terán dereito preferente a localidade:

a) As mestras e mestres desprazadas ou desprazados por falta de horario.

b) O profesorado suprimido, a localidade na que prestaban servizos no momento da supresión.

c) O profesorado procedente do estranxeiro, ás prazas da localidade na que estaban destinados no momento de obter prazas no estranxeiro.

- d) As concelleiras e concelleiros, á localidade na que prestaban servizos no momento no que resultaron elixidas ou elixidos, sempre que non poidan facer efectivo o dereito preferente a centro.

Novena.- Dereito preferente a zona educativa.

- a) As mestras e mestres desprazadas ou desprazados por falta de horario.
- b) O profesorado suprimido, á zona educativa na que prestaban servizos no momento da supresión.
- c) O profesorado procedente do estranxeiro, ás prazas da zona educativa na que estaban destinados no momento de obter prazas no estranxeiro.

Décima.- Adxudicación de vacantes itinerantes.

As vacantes itinerantes só se adxudicarán a aquelas/aqueles electoras/electores que soliciten explicitamente vacantes deste tipo.

Décimo primeira.- Adxudicación de vacantes con afíns

As vacantes con afíns adxudicaráselle só a aquelas/aqueles electoras/electores que soliciten explicitamente vacantes deste tipo agás nas quendas de oficio en que poden ser adxudicadas a calquera elector aínda sen colocar.

Décimo segunda.- Adxudicación de oficio

Adxudicarase de oficio a todas/os as/os participantes que non acaden destino de entre os solicitados, agás ós solicitantes que deixen resulta, e a todas/os aquelas/aqueles que tendo a obriga de participar neste concurso non o fixesen, agás ás/aos mestras/mestres interinas/os e substitutas/os.

No caso das/os mestras/mestres suprimidas/os e desprazadas/os por falta de horario que exerzan o dereito preferente e non obteñan destino, por non existir vacante, adxudicáraselles un posto como substituto de zona, co fin de que non sexan desprazadas/os da zona educativa na que se encontra o centro do seu destino definitivo de referencia, de acordo co establecido no Decreto 140/2006, do 31 de agosto.

Ao profesorado en expectativa de destino e opositores de 2008 adxudicáraselles destino de oficio na súa especialidade, pola orde na que figura a/o profesora/profesor dentro do seu colectivo. A adxudicación realizarase á primeira vacante libre, pola orde na que os centros figuran no anexo desta resolución, tendo en conta a priorización, se é o caso, de provincias feita polo participante.

Cando non exista vacante da súa especialidade, ao profesorado en expectativa de destino e opositoras/opositores do 2008 adxudicáraselles destino de oficio noutra especialidade da que non son titulares, agás en idioma estranxeiro inglés, a non ser que o solicite o participante, e orientación. A adxudicación realizarase unha vez adxudicados as/os profesores en expectativa e opositores do 2008 das especialidades correspondentes, pola orde da lista única e dando prioridade ás peticións de centro, feitas polo participante, sobre a de especialidade.

Así mesmo as vacantes itinerantes e de ocio non se lles adxudicará de oficio a ningún participante.

Décimo terceira.- Forma de efectuar a solicitude e presentación da mesma.

1.- A solicitude de destinos farase a través de internet, empregando o portal educativo no enderezo: www.edu.xunta.es/persoalconcursos/primaria. Lémbrese que para acceder a este servizo web é preciso ter conta de correo electrónico no dominio edu.xunta.es polo que se urxe a quen non a teña proceda a solicitala polos medios actuais (solicitude a través do secretario do centro actual á UAC no 902905445. Deberá terse en conta que unha solicitude anula ou modifica a anterior na aplicación informática, polo que sempre será obxecto de tratamento informático a última solicitude realizada na web dentro de prazo.

2.- O profesorado que solicite prazas do departamento de orientación e posúa algunha das titulacións sinaladas na base cuarta desta convocatoria, deberán remitir unha fotocopia compulsada da referida titulación, sempre que non a presentaran o curso pasado.

3.- A solicitude servirá para vindeiras convocatorias conservando as peticións sen que teña que facer nova solicitude, no caso de que lle interese.

4.- As/os mestres interinas/os e substitutas/os que superen os procedementos selectivos convocados noutra comunidade autónoma comunicarán a dita circunstancia á Secretaría Xeral para os efectos da súa exclusión na adxudicación de destinos provisionais.

Décimo cuarta.- Solicitudes exercendo o dereito preferente

Os afectados que desexen exercer o dereito preferente están obrigados a facer constar nas petición o centro, a localidade e a zona do seu ámbito de dereito preferente, colocando en primeiro lugar as peticións para as que está habilitado, e por último as restantes, tendo en conta que se poderán adxudicar a este colectivo prazas de educación infantil, educación musical, filoloxía francesa e de educación física, neste último caso se non teñen cumpridos os 55 anos no día 1 de setembro de 2008.

Décimo quinta.- Prazo de cumprimentación da instancia na web.

1.- Para o profesorado suprimido, desprazado por falta de horario e en expectativa de destino, interinos e substitutos, o prazo será de vinte días naturais contados a partir da publicación da presente resolución no Diario Oficial de Galicia.

2.- Para os opositores que superen o procedemento selectivo convocado pola Orde do 9 de abril de 2008, que non sexan interinos ou substitutos o prazo será de cinco días naturais contados desde o seguinte ao da publicación da lista de aprobados pola comisión de selección.

3.- As persoas ás que se lles conceda unha comisión de servizos por motivos de saúde ou de conciliación familiar, realizarán a solicitude no prazo de cinco días desde que se notifique a concesión da comisión.

Décimo sexta.- Profesorado que non ten que cumprimentar nova instancia na web.

1.- Non terán que cumprimentar nova solicitude, agás que queiran efectuar nova solicitude ou modificar a realizada para a convocatoria do curso académico anterior:

a) o profesorado que estaba desprazado por falta de horario no curso 2007-2008 e continúe como desprazado no curso académico 2008-2009.

b) O profesorado que estaba suprimido.

c) O profesorado que estaba e continua en expectativa de destino.

d) As/os opositoras/opositores que superaron o procedemento selectivo no ano 2007.

e) O profesorado interino e substituto que prestou servizos con anterioridade ao 30 de xuño de 2007.

2.- Non poderán participar neste concurso o profesorado que teña concedida unha comisión de servizos, agás nos supostos recollidos na base segunda da presente convocatoria.

Décimo sétima.- Petición de prestar servizos nunha ou varias provincias

O profesorado interino e substituto que non obteña praza nesta adxudicación poderá acollerse a prestar servizos como interino ou substituto nunha ou varias provincias, sen perda da orde da lista. O que non efectúe opción enténdese que desexa prestar servizos en todas as provincias da comunidade autónoma.

Décimo oitava.- Obtención de destino nunha especialidade para a que non se está habilitado.

Con posterioridade á resolución definitiva dos destinos provisionais, ás/aos profesoras/profesores interinas/os que, solicitando todas as prazas da súa especialidade, non lles corresponda praza, adxudicaráselles voluntariamente praza noutra especialidade, se existise vacante, unha vez colocados todos os colectivos sinalados na base segunda desta resolución, agás nas especialidades de Filoloxía e lingua estranxeira: inglés, Filoloxía e lingua estranxeira: francés, Pedagogía terapéutica e Audición e linguaxe.

Ao profesorado substituto unicamente poderá adxudicárselle praza da súa especialidade.

Décimo novena.- Publicación das listas de participantes e das vacantes

1.- Coa entrada en vigor desta resolución, a Secretaría Xeral procederá a publicar as relacións de persoal agrupados por colectivos coas especialidades que teñen recoñecidas nas delegacións provinciais da Consellería de Educación e Ordenación Universitaria e na páxina web da consellería. Os interesados terán un prazo de dez días naturais para formular as reclamacións que entendan oportunas.

2.- Antes do 10 de xullo de 2008, a Secretaría Xeral procederá a publicar as vacantes provisionais que se ofertan neste concurso, reflectindo o seu perfil. As/os interesadas/os terán un prazo de cinco días naturais para formular as reclamacións que entendan oportunas.

3.- Ademais das vacantes publicadas, adxudicaranse as resultas, se é o caso, que se produzan como consecuencia da adxudicación de destinos polas comisións de servizos por motivos de saúde, conciliación familiar e concelleiros. Consecuentemente, os centros e as delegacións provinciais non solicitarán as prazas destas comisións de servizos.

Vixésima.- Resolución provisional

1.- Unha vez rematado o prazo de solicitudes das/os opositoras/opositores, a Secretaría Xeral procederá á adxudicación de destinos e fará pública a resolución provisoria do concurso na Consellería de Educación e Ordenación Universitaria, nas súas delegacións provinciais e na páxina web.

Dita resolución farase pública o día 29 de xullo de 2008.

2.- As/os concursantes poderán presentar reclamacións á resolución provisoria, no prazo de tres días hábiles desde a súa publicación, perante a Secretaría Xeral.

Vixésimo primeira.- Renuncias á resolución provisional.

As/os mestres interinas/os e substitutos que estean nunha situación das que se relacionan a continuación, poderán renunciar á resolución provisional, sen que se admitan renuncias parciais.

- Atender o coidado dunha/dun filla/fillo menor de seis anos, tanto cando o sexa por natureza como por adopción ou acollemento permanente ou preadoptivo.
- Para atender o coidado dun familiar que teña ao seu cargo, ata o segundo grao de consanguinidade ou afinidade, que, por razóns de idade, accidente ou enfermidade, non poida valerse por si mesmo e non desempeñe actividade retribuída.
- Por enfermidade grave.
- Por ter concedida unha bolsa de estudos.
- Por ampliación de estudos. Enténdese que hai ampliación de estudos cando se realiza o doutoramento ou estudos para obter un título superior ou unha diplomatura distinta da que se posúe, así como a formación no estranxeiro nas linguas ou nas ensinanzas de réxime especial.
- Por ser vítima de violencia de xénero.
- Por calquera das circunstancias que permite aos funcionarios públicos a concesión dos servizos especiais.

De serlle adxudicada a praza definitiva, non poderán acollerse a non prestar servizos mantendo o número de orde na lista correspondente, agás que esta petición se formule por unha situación sobrevida á resolución definitiva do presente concurso.

Sen prexuízo do anterior a Secretaría Xeral poderá dar de baixa a algunha persoa na relación de adxudicatarios de praza, se deixase de reunir os requisitos para manterse nela, de oficio ou por instancia da parte interesada, logo de audiencia do interesada/o.

Vixésimo segunda- Resolución definitiva.

Resultas as reclamacións presentadas, procederase a efectuar a resolución definitiva que se publicará nos mesmos lugares que a resolución provisional e no Diario Oficial de Galicia. Dita resolución farase pública o día 28 de agosto de 2008.

Vixésima terceira.- Efectividade da toma de posesión

Os efectos da toma de posesión dos destinos adxudicados será a do 1 de setembro de 2008.

Vixésima cuarta.- Inclusión nas listas para interinidades e/ou substitucións

As/os participantes nos procedementos selectivos convocados pola Orde do 9 de abril de 2008, que non estean incluídos nas listas dos aspirantes que superaron estes, nin na letra j) da base segunda da presente resolución serán incluídos nas relacións de aspirantes para desempeñar prazas de interinidades ou substitucións, na especialidade pola que se presentaron sempre que superen a proba ou estean en posesión da titulación que se relaciona para cada especialidade no anexo II.

A estes efectos, as/os mestres da especialidade de matemáticas, ciencias naturais, ciencias sociais ou filloxía francesa que se presenten a especialidade de educación primaria e non superen a fase de oposición incluíranse na listaxe de educación primaria.

Santiago de Compostela, 29 de maio de 2008

SECRETARIO XERAL

Benito Fernández Rodríguez

ANEXO II

| Especialidades | Titulación |
|---|--|
| Educación Infantil | <p>Mestra/Mestre.- Especialidade de Educación Infantil</p> <p>Profesora/Profesor de Educación Xeral Básica, especialidade Preescolar</p> <p>Mestra/Mestre.- Especialidade de Educación Primaria e títulos homologados</p> |
| Filoloxía e lingua estranxeira: inglés | <p>Mestra/Mestre.- Especialidade de Lingua estranxeira</p> <p>Profesora/Profesor de Educación Xeral Básica: especialidade en Lingua Española e Idioma Moderno</p> <p>Licenciada/o en filoloxía inglesa, ou ter superados os tres primeiros cursos desta licenciatura.</p> |
| Filoloxía e lingua estranxeira: francés | <p>Mestra/Mestre.- Especialidade de Lingua estranxeira</p> <p>Profesora/Profesor de Educación Xeral Básica: especialidade en Lingua Española e Idioma Moderno</p> <p>Licenciado en filoloxía francesa, ou ter superados os tres primeiros cursos desta licenciatura.</p> |
| Educación Física | <p>Mestra/Mestre.- especialidade de educación física</p> <p>Profesor de Educación Xeral Básica, especialidade de educación física</p> <p>Mestra/Mestre.- especialidade de educación primaria e títulos homologados.</p> <p>Licenciada/o do INEF, ou ter superados os tres primeiros cursos desta licenciatura.</p> |
| Educación Musical | <p>Mestra/Mestre.- especialidade de educación musical</p> <p>Mestra/Mestre.- especialidade de educación primaria e títulos homologados</p> <p>Título de grao medio ou superior dos conservatorios de música.</p> |
| Pedagogía Terapéutica | <p>Mestra/Mestre.- Especialidade de educación especial</p> <p>Profesora/Profesor de Educación Xeral Básica, especialidade de Educación Especial</p> <p>Licenciada/o en Pedagogía e homologados.</p> <p>Licenciada/o en Psicopedagogía</p> |
| Audición e Linguaxe | <p>Mestra/Mestre, especialidade en Audición e Linguaxe</p> |
| Educación Primaria | <p>Mestra/Mestre.- especialidade de educación primaria</p> <p>Profesora/Profesor de Educación Xeral Básica, especialidade de educación primaria</p> <p>Mestra: especialidade de matemáticas, ciencias naturais, ciencias sociais ou filoloxía francesa.</p> |